

**“ТӨРӨӨС МӨНГӨНИЙ БОДЛОГЫН ТАЛААР 2023 ОНД БАРИМТЛАХ ҮНДСЭН
ЧИГЛЭЛ БАТЛАХ ТУХАЙ” УЛСЫН ИХ ХУРЛЫН ТОГТООЛЫН ТӨСЛИЙГ
ХЭЛЭЛЦЭХ ЭСЭХ ТАЛААРХ ЭДИЙН ЗАСГИЙН БАЙНГЫН
ХОРООНЫ САНАЛ, ДҮГНЭЛТ**

2022 оны 10 дугаар
сарын 04-ний өдөр

Улаанбаатар
хот

Илтгэгч нь: Улсын Их Хурлын гишүүн С.Чинзориг

Улсын Их Хурлын дарга, эрхэм гишүүд ээ,

Монголбанкнаас Төв банк /Монголбанк/-ны тухай хуулийн 10 дугаар зүйлийн 10.2 дахь хэсэгт заасны дагуу 2022 оны 9 дүгээр сарын 27-ны өдөр Улсын Их Хуралд ирүүлсэн “Төрөөс мөнгөний бодлогын талаар 2023 онд баримтлах үндсэн чиглэл батлах тухай” Улсын Их Хурлын тогтоолын төслийн хэлэлцэх эсэх асуудлыг Эдийн засгийн байнгын хороо 2022 оны 10 дугаар сарын 04-ний өдрийн хуралдаанаараа хэлэлцлээ.

Төрөөс мөнгөний бодлогын талаар 2023 онд баримтлах үндсэн чиглэлийн төсөлд хэрэглээний үнийн индексээр хэмжигдэх инфляцийг 2023 онд нэг оронтой тоонд, дунд хугацаанд 6 ± 2 нэгж хувийн интервалд тогтворжуулах зорилтыг хангахад чиглэсэн бодлогыг үргэлжлүүлэн хэрэгжүүлэх, банкны салбарын шинэтгэлийн хөтөлбөрийн хүрээнд банкны хяналт шалгалт, зохицуулалтын арга хэрэгслийг олон улсын жишиг, зарчимд нийцүүлэх, эрсдэлд суурилсан хяналт шалгалтын арга барилд шилжих арга хэмжээг үргэлжлүүлэн хэрэгжүүлэх, Төв банк олон нийттэй харилцах харилцаагаа олон улсын сайн туршлагад тулгуурлан өөрийн орны онцлогийг тусгасан хэлбэрээр боловсронгуй болгох, иргэдийн мэдээллийн тэгш бус байдлыг бууруулах, хүлээлтийг тогтворжуулах, улмаар бодлогын зорилтод үр дүнтэй хүрэх боломжийг нэмэгдүүлэх, төлбөрийн системийн эрх зүйн орчныг боловсронгуй болгох, олон улсын шилдэг технологийг нутагшуулах, санхүүгийн үйлчилгээний инновацыг дэмжих, цахим хөгжлийн багц хуультай уялдуулан мэдээллийн аюулгүй байдлын менежментийн тогтолцоог олон улсын жишигт нийцүүлэн хөгжүүлэх, иргэдэд эдийн засаг, санхүүгийн суурь мэдлэг олгох чиглэлээр тодорхой ажлуудыг үргэлжлүүлэн хийхээр төлөвлөжээ.

Геополитикийн эрсдэл өндөр хэвээр хадгалагдаж, БНХАУ-д “Тэг-КОВИД” бодлого цаашид үргэлжлэхээр байгаа үед Монгол Улсын Засгийн газар, Монголбанк, Санхүүгийн зохицуулах хороо хамтран гадаад орчны сөрөг нөлөөг зөөлрүүлж, эдийн засгийг дэмжих, гадаад төлбөрийн чадварыг сайжруулж, гадаад санхүүжилтийн эх үүсвэрийг нэмэгдүүлэх, тээвэр, логистикийн чадавхыг сайжруулж, үүсээд буй тээврийн хүндрэлийг шийдвэрлэх, уул уурхайн бус экспортыг нэмэгдүүлэхэд гадаад худалдааны санхүүжилтийн бүтээгдэхүүн, үйлчилгээг шинээр хөгжүүлж, нэвтрүүлэх, тогтвортой, ногоон санхүүжилтийн тогтолцоог бэхжүүлэх, “Мөнгө угаах, терроризмыг санхүүжүүлэхтэй тэмцэх хөтөлбөр”-ийг хэрэгжүүлэх зэрэг олон чиглэлээр төр, хувийн хэвшлийн байгууллагуудтай үргэлжлүүлэн хамтран ажиллахаар төлөвлөсөн байна.

Цаашид нийгэм, эдийн засгийн бодлогыг эдийн засгийн эмзэг байдлыг бууруулах, валютын дотогшлох урсгалыг нэмэгдүүлэх, зорилтот бүлэгт чиглэсэн халамжийн бодлого хэрэгжүүлэхээс гадна дунд, урт хугацааны тогтвортой хөгжлийн зорилттой нийцүүлэх, цаашид үүсэж болзошгүй эрсдэлээс сэргийлэх, эдийн засгийн

дотоод, гадаад тэнцвэрийг хангахад макро эдийн засгийн бодлогуудыг уялдуулан чиглүүлэх зэрэг бодлого, арга хэмжээнүүдийг тусгасан байна.

Тогтоолын төслийг хуралдаанаар хэлэлцэх явцад Улсын Их Хурлын гишүүн С.Чинзориг валютын нөөц нэлээд хомсдчихсон, ханш тогтворгүй, инфляцийн хөөрөгдөл өндөр байгаа үед дотооддоо өөрсдөөсөө шалтгаалах асуудлаа шийдэж чадаж байгаа эсэх дээр анхаарах, Улсын Их Хурлын гишүүн Т.Доржханд 2023 оны мөнгөний бодлогын зорилтуудаа шинэчлэх, төсөв тэлсэн энэ орон зай дээр ямар ч бодлого хэрэгжүүлэх боломжгүй учраас бодитой болгох, төлбөрийн тэнцэл, гадаад бондын өр, төлбөрийн асуудал, гадаад нөөцөө хэрхэн удирдах талаар тодорхойгүй байгаа тул дахин тодотгох, энэ талаар тодорхой төлөвлөгөө гаргаж хэрэгжүүлэх шаардлагатай гэсэн санал гаргасан болно.

Байнгын хорооны хуралдаанаар хуралдаанд оролцсон гишүүдийн олонх дээрх тогтоолын төслийг үзэл баримтлалын хүрээнд дэмжиж, Улсын Их Хурлын чуулганы нэгдсэн хуралдаанд оруулж хэлэлцүүлэх нь зүйтэй гэж үзсэн болно.

Улсын Их Хурлын эрхэм гишүүд ээ,

“Төрөөс мөнгөний бодлогын талаар 2023 онд баримтлах үндсэн чиглэл батлах тухай” Улсын Их Хурлын тогтоолын төслийг хэлэлцэх эсэх талаарх Эдийн засгийн байнгын хорооны санал, дүгнэлтийг хэлэлцэх шийдвэрлэж өгөхийг Та бүхнээс хүсье.

Анхаарал тавьсанд баярлалаа.

**ЭДИЙН ЗАСГИЙН БАЙНГЫН
ХОРООНЫ ДАРГА**



Ц.ЦЭРЭНПУНЦАГ